

खेल खेलबो स्वरुथ्य रहबो सुरेखा नवरत्न



आलोक प्रकाशन



खेल खेलबो स्वस्थ रहबो

(खेलगदिया हमर छत्तीसगदिया ल साकार करबो)

C-2021 सुरेखा नवरत्न

आलोक प्रकाशन

संगवारी मन ल

जय जोहार

मोर नान्हे - नान्हे मयारू लईका मन ल, अऊ शिक्षक, पाठक संगवारी मन ल बतावत अब्बड़ सुख लागत हवय कि ए बेरा मैहा फेर आदरणीय आलोक प्रकाशन के माध्यम ले , हमर माटी के भाखा छत्तीसगढ़ी म, हमन के छत्तीसगढ़िया पुरखौती खेल मन के सुघर जानकारी लाने हंव | नान्हे संगवारी हो, मनखे मनके जिनगी म खेल के अब्बड़ महत्तम रईथे | खेल ह हमन के तन, मन अऊ जीवन ल सुघर बनाथे | हमन बड़ भागमानी आय अन, कि हमन छत्तीसगढ़ महतारी के कोरा म जनम लेहन | हमर छत्तीसगढ़ के पुरखौती, संस्कृति, तिहार-बार, गीतगोविन्द, खेलकूद अब्बड़ निराला हे | जेन खेलकूद ल खेल के हमन बाढ़े , उपजे हन, कई ठन ल तुहुच मन खेलत होहा| फेर आजकाल के मशीन के जुग म बहुत अकन खेल मन नदावत हे, बिसरावत हे |

संगवारी हो हमन ल हमर पुरखौती खेल मन ल बिसराना नई ये, भलुकन नवा पीढ़ी मन ल सिखोना हे | खेले कूदे ले तन-मन दुनो स्वस्थ रईथे, त चलव जानबो हमर गंवई के सुघर खेल मन के बारे म...

— सुरेखा नवरत्न

खेल के महत्ता

नान्हे संगवारी हो, खेला के हमर जिनगी म अब्बड़ महत्ता हवय | खेला ले हमर मनोरंजन, अऊ टेम पास तो होबे करथे, संगे संग खेले कूदे ले हाथ गोड़ घलो पसुर होथे | आलस ह भागथे, अऊ शरीर घलो ह सुवस्थ रहथे | खेल म हमन ल नवा पहिचान मिलथे, पैसा कौड़ी घलो मिलथे अऊ सरकार के तरफ ले आनी बानी के ईनाम , तमगा घलो मिलथे | खेलाड़ी मन के देश बिदेश घलो म अब्बड़ नाम होथे | आजकल के दिन म बहुत अकन नवा नवा मशीन अऊ मनोरंजन के साधन आ घले हे | टी. वी., रेडवा, मोबईल फोन, बिडियो गेम अऊ आनी बानी के जिनीस | जेकर कारन लोग लईका मन गली खोल म खेलई ल भुलावत जाथें | अऊ हमर अब्बड़ अकन छत्तीसगढ़िया खेला मन नदावत हे |

मैं ए नई कहतव की ए मन म मत भुलावव, एमन के आय ले तो अऊ हमन के गियान म दस गुना बढ़ोतरी होय हवय | एकर ले तो हमर नान नान लईका मन अब्बड़ ओस्ताज हो घले हैं | फेर लईका हो एकर संगे संग खेलई कूदई घलो ल बरोबर करत रहव | अऊ हमर छत्तीसगढ़िया खेलगढ़िया के नाव ल रोशन करत रहव |

अनुक्रमणिका

1. घरघुंदिया.....	7-8
2. फुगड़ी.....	9-10
3. अटकन- बटकन.....	11-13
4. ईभा-डांड (गुल्ली डंडा).....	14-15
5. बीस- अमृत.....	16-17
6. अट्टी (गोटी)	18-19
7. चिंगरी- भुसभुसी.....	20-21
8. फल्ली.....	22-23
9.. खटिया पाटी.....	24
10. बित्ता कूद.....	25-26
11.. कबड्डी.....	27-28
12. बांटी (कंचा).....	29-31
13. भौरा.....	32-33
14. कितकिता(बिल्लस).....	34-35
15. सातुल(पिट्टूल).....	36-37
16. नदी- पहाड़.....	38-39
17. डंडा- पचरंगा.....	40-41

18. टोपा- बंधऊल...	42-43
19. तीड़ीपासा.....	44-46
20. रेसटीप...	47-48
21. रंग- बिरंगा.....	49
22. घोर- घोर रानी.....	50-51
23. तोता उड़ मैना उड़...	52-53
24. दस्सो- पिंजो... ..	54-55
25. कुढ़ील... ..	56-57
26. आम्बे- बाम्बे.....	58
27. चुरी जीत.....	59
28. चुरमुंदरी... ..	60-61
29. चालगोटी (कसाड़ी)	62-63
30. दही मही.....	64-65
31. परिचय और चित्र..	66-67

1. घरघुंदिया



घरघुंदिया ल जादा नोनी लईका मन खेलथे, दर्दा-
धूर्दा ल सकेल के चारो मुड़ा म सुग्घर पार बनाथे
| घर असन डिजईन बनाथे, रंधनी कुरिया, बड़े
कुरिया, छोटे कुरिया, परछी, गरूआ कोठा
बनाय रथें | रंधनी कुरिया म माटी के थारी-
बटकी, अऊ रंग- रंग के बरतन -भंडवा चुल्हा

चंकी बनाय रथे । पड़ोस म एको दू झन अऊ
लईका मन घलो ओसने घरघुंदिया बनाय रथे,
जैसे – बड़े मन असल जिनगी म काम बुता
करथे, लईका मन ओसने ठगे- ठग के नकल
मारथे । माटी के नहितो चेंदरी- गोंदरी के पुतरा-
पुतरी घलो बनाय रथें । अऊ बढ़िया मजा के
खेलत रईथें ।

2. फुगड़ी



फुगड़ी ल जादातर नोनी लईका मन खेलथे | चार,
छै, आठ, दस कतको झन हो जाय, ए खेल
म कुछु समान के जरूरत नी परय | नोनी
मन भुईयां म ऊखरू बईठ के दूनों गोड़ई ल
पारी के पारी आघू-पाछू घसलार्थें | लगातार

गोड़ ल चलावत रथें | जेन लईका ह गोड़
चलावत-चलावत हंफर के थक जाथे, अऊ
रूक जाथे ओहा हार जाथे | अऊ सबले जादा
बेरा तक टिके रईथे, ओहा जीत जाथे |

3. अटकन बटकन



ए खेला म छोटे- छोटे लईका मन,
अंगना, परछी नईतो चौरा घलो म गोलिया बना
के बईठ जाथें | अऊ अपन हथेरी ल भुईयां म रख
देथे , एक लईका ह अघुवा बन के अपन जेवनी

हाथ के अंगठी ले पारी के पारी गाना गा- गा के
छुथे ।

अटकन- बटकन ,
दही- चटाकन
लऊहा- लाटा बन के कांटा
तुह्र- तुह्र पानी जावय,
सावन म करेला फुटय.
चल- चल बेटी गंगा जाबो
गंगा ले गोदावरी जाबो
पक्का-पक्का आमा खाबो
आमा के डार टुटगे
पठान टूरा जुझगे
आस लाम कांटा

गुलाम सिंग राजा...

गीत ह जेकर हाथ म आखिरी सिराथे , ओहा
अपन हथेरी ल सीधा लहूटा लेथे । पारी के पारी
सबो के हंथेरी सीधा होत जाथे ,त एक दूसर के
कान ल धरथे अऊ गाना घलो गाथे ...

तिरी- मिरी मेंकरा के झाला
कौवा गावय आल्हा... घर म ननकी लईका मन
ल ए खेल अऊ गाना ह अब्बड़ सुहाथे ।

4.ईशभा डांड (गुल्ली डंडा)



एहा हमर गंवई के लईका मन के सबले
पसंदीदा खेल आय | ए खेल ल दूझन ले,
लेके पांच छै झन लईका मन घलो खेल
सकत रथे | एक ठन लकरी के डंडा अऊ
छोटे लकरी ल बढ़िया छोलके चोखी ईशभा

बनाय रथे । भुईयां म एक ठन गोला बनाय
रथे, तेकर बीच म ईश्वर ल मढ़ाके मारथे ।
जेकर ह थोरहे धूरिहा म जाथे तेकर दाम
होथे । पारी के पारी मारते जाथे, अऊ जेन
जगा ईश्वर ह जाय रथे ओई जगा ले, दाम
रथे तेहा निशाना लगाके टूकत रथे ।

5.बीस अमृत (पत्थर -परी)



ए खेल म चार झन से लेके दस बारा लईका घलो
मन खेल सकत रथे | सब एती ओती भागत रथे अऊ
जेन लईका के माथ रईथे ते हा ओमन छू के बीस
कईथे , बीस कहते ही ओहा एक जगा खड़े हो जाथे
| आने लईका मन ओला अमृत देहे बर आथे, त

जेकर माथ रईथे तेहा छुए के कोशिश करथे | अमृत
कहे के बाद फेर भागे लागथे | अऊ अमृत कहे के
बेरा छू लेथे त ओकर माथ हो जाथे | असनेच पत्थर
परी घलो ह रईथे, एमा बीस के जगा में पत्थर अऊ
अमृत के जगा म परी कईथे |

6.अट्टी (गोटी)



ए खेल म जादातर नोनी लईका मन खेलथें, अब्बड़
अकन गोटरका ल बिन के ले आनथे अऊ बगरा

देथे | दू ठन टीम बनाथे, जोही वाला या एक एक झन
घलो खेल सकत रथे | पारी के पारी एक हाथ नितो
दूनो हाथ म, एक गोटी ल ऊपर फेंक के, एक गोटी ल
बिन बिन के उठाते जाथे अऊ ऊपर फेके गोटी ल
झट ले झोंक लेथे | गोटी ल झोंके नी पावय या हिल
जाथे त आने लईका के पारी आ जाथे | असनेच
करके जेन ह जादा गोटी सकेलथे , तेन ह कम पाय
रथे तेला उधारी देथे | मंझनियां के बेरा लईका मन ए
खेल ल दिन भर बइठे बईठे खेल देथें | गोटा के एक
ठन अऊ तरीका म केवल पांच गोटी रईथे अऊ एमा
एकहथ्थूल, दूहथ्थूल, अऊ कई परकार के खेले
जाथे |

7.चिंगरी भुसभुसी

ए खेल म आठ, दस ,बीस कतको झन लईका खेल सकथे | दू ठन दल बनाय रथे, अऊ दूनो म एक- एक झन राजा रईथे | राजा मन अपन- अपन परजा मन के नवा- नवा नाम रखे रखथे | एक दल के राजा ह दूसर दल म बुले जाथे अऊ एक झन के आंखी ल अपन दूनो हथेरी से बंद कर देथे, अपन दल के एक लईका ल बदले हुए नाव लेके बलाथे | ओ लईका आके जेकर आंखी मुंदाय रथे तेला धीरे से कोथ देथे नईतो चुट ले मारके भाग जाथे अऊ अपन जगा म जाके बईठ जाथे | सब झन मिलके गाना गाथे-

“ चिंगरी भुसभुसी, मानमती के दाई
तोर ददा खावय मुर्दा, तोर दाई खावय लाई” ।

कईके गाना गावत रथे । ओई म मारे कोथे आय रथे
तेन बच्चा ल चिन्हे जाथे, चिन्हारी पा जाथे त ठीक
नीतो , दुसर पार्टी म शामिल हो जाथे ।

8. फल्ली डांड



ए खेल म पांच संगी रईथे | अऊ लकीर खींच
के चार ठन बड़े- बड़े चरकोनिया घर (खाना)
बनाय रथे | जेन संगी के माथ (दाम) रथे,

ओहा बीच म चार ठन खपरैल के टुकड़ा या
पथरा के टुकड़ा के रखवार रईथे । खेलईया
संगी मन ओ खपरैल मन ल हेरे के उदीम
करथे, हेरत घानी जेकर माथ रथे तेहा छू
डालते त ओकर दाम हो जाथे, अगर नई छू
पावय त, खपरैल ल चारो संगी, एक एक ठन
लेके, एक ठन खाना म एकट्ठा हो जाथे
अऊ जोर से फल्ली कईके चिल्लाथे।

9. खटिया पाटी

ए खेल म घलो पांच लईका रईथे, हमन स्कूल म पढ़त रहन त अब्बड़ खेलन | एक ठन कमरा के चारो कोन्टा ल एक एक झन पोगरा लेथे | जेकर माथ रथे ओहा बीच म रथे, ए कोन्टा ले ओ कौंटा एकर जगा ले ओकर जगा जाय के कोशिश करथे | ओई बीच म अगर माथ देय वाला संगी ह आने के कोन्टा म जाय बर ताकत रईथे | अगर चल देथे त नई जाय पावय ते संगी के नावा माथ हो जाथे |

10. बिता कूद



ए खेल ह ऊंचा कूद असन आय, एमा एक झन
संगी ह भुईयां म गोड़ लमा के बईठे रथे,

अऊ अपन दूनों हाथ के बित्ता ले दूनों गोड़
ल संटाके ऊंचा बनाय रथे । आने संगी मन
ओकरे ऊपर ले कूदत जाथे । कूद दारथे त
अऊ ऊंचा ल बढ़ाय जाथे, जेकर गोड़ ह बित्ता
के ऊंचाई ल छुवा जाथे ओहा हार जाथे ।

11. कबड्डी (हू-तू-तू)



ए खेला ल लईका सियान, नोनी- बाबू सब इन खेलथे | एहू म दू ठन दल रईथे, एक दल के एक खेलाड़ी ह दूसर दल म कबड्डी - कबड्डी कहत कहत जाथे अऊ ओमन ल छूए के परयास करथे | दूसर

दल मन धरे के परयास करथे | एतके बखत लंबा
साहस लेना रईथे, साहस टूटना नई रहय, साहस
टूटथे तेहा मर (फऊ) जाथे | अऊ ओमन ल छू के
बीच लकीर तक बिना साहस टूटे वापिस आ जाथे
तेहा , जीत जाथे | असनेच करके खेलाड़ी मन फऊ
होवत जाथे, त पाली के हार जीत होवत जाथे | अऊ
ए हा मनखे मन के अब्बड़ पसंद के खेला ए | पूरा
देश घलो म एला खेलथे |

12.बांटी (कंचा)



बांटी के खेला ल कई परकार के खेले जाथे ।
कई झन संगवारी मन मिलके बांटी खेलथे,
एमा भुईयां म छोटकन गुच्ची खनथे ।
अऊ ओकर थोरकन दूरिहा म लकीर

खींचे रईथे । लकीर मेर खड़े होके , पारी
के पारी जम्मो संगी अपन –अपन बांटी
ल दूलो -दूलो के गुच्ची म डारे के
कोशिश करथे । जेकर ह गुच्ची म पहुँचथे
तेहा पहला, लकठा वाला , दूसरा, तीसरा,
चौथा हो जाथे । अब खेला शुरू करथे,
दूदी , चार-चार जतको मन लागय सबके
मरजी ले बांटी सकेल के एक संग दूलोथे,
फेर कोनो एक बांटी ल निशाना लगाके
टूकना रईथे । अगर कहे रथे ओईच म
निशाना लग जाथे त सब ल जीत जाथे,
अऊ नई परय त हार जाथे । अगले दाम

के लिए फेर बांटी के जुर्माना भरके खेलना परथे ।

दूसर तरह के खेल म, एक ठन गोला के भीतरी म बांटी मन ल रखे जाथे अऊ, संगी मन के बताय बांटी म अपन हाथ के बीच अंगठी से बांटी म निशाना लगाना रईथे । बताय हुए बांटी ल लग जाथे त खेलईया लईका ह जीत जाथे अऊ नई परय त हार जाथे ।



13. भौंरा (लट्टू)



ए खेल म लकड़ी के सुग्घर अऊ चोखी, भौंरा बनाया
रथे, संग म पतली अऊ लम्बा डोरी घलो रईथे ।
भौंरा म डोरी ल बरोबर कई पुरुत के लपेटे रईथे ।

अऊ घुमा के भुईया म छोड़ देथे, भौंरा ह रेस मारके
किंदरत रईथे | दूसर संगी घलो मन अपन भौंरा ल
चलाथे, चलते चलत जेकर भौंरा ह दूसर के ल गिरा
देथे , ओहा जीत जाथे |

14. कितकिता (बिल्लस)



कितकिता खेल ल अंगना म पथरा बिछे रईथे
तेमा नईतो भुईयां म चाक से चरकोनिया खाना

बनाके खेलथे | एमा पांच नहितो दस ठन खाना बने
रईथे | तेमा पथरा, खपरैला के तुकड़ा (मिड्डा) ल एक
गोड़ म सरकावत जाथे | एक गोड़ ल पीछू कोती
ऊपर टांगे रथे अऊ कितकित, कितकित कहत रथे,
अगर साहस ह टूट जाथे या फिर मिड्डा लकीर म पर
जाथे त ओहा फऊ हो जाथे |

15. सातुल (पिट्टूल)



सातुल ह अब्बड़ मजेदार खेल आय, एमा एको
पैसा खरचा करे बर नई लागय । चिथरा

फटहा ओनहा ल लपेट -लपेट के गेंद असन
गोलवा गठरी बना लेथे । सात ठन चेपटा-
चेपटा पथरा के तुकड़ा लानथे, तरी के बड़े,
फेर ओकर ले थोरकन छोटे, फेर ओकर ले
छोटे....., असने करके गांजे रईथे । दू ठन
टीम बनाय रथे, एक टीम के मन पथरा
गांजत रथे, अऊ दूसर टीम के मन, गेंद म
फैंक – फैंक के मारत रथे । टीम के संगी
मन गेंद के मारई ल रोकत रथे, जब पथरा
ह गंजा जाथे तब जोर से सातुल कईथे ।

16. नदी पहाड़

नदी पहाड़ के खेल ल, अंजोरी रात म खेले ल
अब्बड़ मजा आथे। फेर लईका मन तो
कतको बखत खेलत रथे । ए खेल म चौरा,
पथरा अऊ ऊंचा जगह मन ल पहाड़ माने
जाथे अऊ भुईया ल नदी । जेकर माथ रईथे
तेन ह नदी म रईथे, अऊ आने संगी मन
पहाड़ म रथे । जेकर माथ रईथे ओला लईका
मन नदी म उतरके तमकावत रथे, अऊ गाना
गावत रथे, “ काकर नदी के दूध भात ल
खाथन जी, काकर नदी के दूधभात ल खाथन

जी” “तोर नदी म डूबक डैय्या,छू ले रे मोर
छोटू भैय्या “ । ओहा छूए बर दौड़ाथे, जेन ल
छू लेथे तेकर माथ हो जाथे ।

17.डंडा पचरंगा

गाँव म लईका मन मैदान, गली खोल म ए खेल ल खेलथे । तीन से लेके आठ, दस इन लईका जुर् मिल के खेलथें । सब लईका मन पारी के पारी कोंघर के अपन दूनों गोड़ ल फैला के नीचे ले कस के डंडा ल फेंकत जाथे ।



जेकर डंडा ह थोरहे धूरिहा जाथे ओकरे दाम
होथे । दाम देवईया लईका ह अपन दूनों
हाथ म डंडा ल ऊपर टांग के धरे रईथे अऊ
पीछू कोती ल आने लईका मन अपन डंडा
से, ओला फेंक- फेंक के दूरिहा लेगत जाथे,
खेला के शुरू म ए तय होय रथे की डंडा
फेंकें के बाद झट ले, अपन डंडा ल लकरी,
पथरा, नीतो बनकचरा म छूवाना रईथे । अऊ
नी छूए रहय तेन लईका ल, दाम देवत रथे
तेहा छूवे के कोशिश करथे । अगर छू लेथे
त नवा दाम हो जाथे । अऊ डंडा ह जतका
दूरिहा जाय रथे ऊंहा ले मुड़ी म बोहे -बोहे
शुरू करे रथे ऊंहा तक लाना परथे ।

18. टोपा बंधऊल



ए खेला म कई झन लईका मन खेल सकत रईथे ।
पहिली सब लईका मन गोल खड़े होके
अपन- अपन एक -एक हाथ से अट्‌टीपट्‌टी
करथे, फेर जेकर दाम होथे जेकर आंखी म
कपड़ा के टोपा बांध देथें । सब संगी मन टोपा बंधाय
रथे तेला धीरे कन चिमट के नहितो मारके एती -
ओती भागत रईथे । दाम देवईया ह ओमन ल छुए
के कोशिश करथे, अगर छूवऊल पा जाथे त ओकर
दाम हो जाथे ।

19. तीड़ीपासा



मंझनिया के बेरा एक जगा बईठे-बईठे टईमपास
करे के अब्बड़ बढ़िया खेल आय | नोनीपिला

,बाबूपिला, छोटे- बड़े सबो एला खेलथे | ए खेल म चार झन संगी रईथे |

जमीन म एक जगा चाक नहितो, रंग रोगन से एक ठन चरकोनिया डब्बा बनाथे , ओकर भीतर म एक बरोबर अकार के पच्चीस ठन छोटे- छोटे डब्बा बनाथे | चारो संगी मन चारो मुड़ा म बईठ जाथे | चाले के लिए चिचोला के पांच ठन बीज ल दूदीफाली करेके पासा बनाय रथे(ए पासा ल लकरी, सुतई , कौड़ी घलो के बन जाथे) अऊ अलग- अलग परकार के चार-चार गोटी रखे रईथे | छोटे- छोटे गोटी, दार, चना, बंबरी बीज कुछु हो सकत हे | एक झन ह पासा ल घुमा के नीचे फेंकथे, अऊ जतका परथे ओतके

घर अपन एक गोटी ल रेंगाथे | असने पारी के
पारी सबो संगी चालत जाथे, अऊ जेकर सब गोटी
ह डूब जाथे तेहा जीत जाथे। जेकर आखरी तक नी
डूबे रहय ओहा हार जाथे | आजकल के लूडो ह
निमगा एकरेच असन खेल आय। मैं तो कइथव
इही ल देखके लूडो ल बनाय हवय ए खेला से
लईका मन ल गिनती पहाड़ा अऊ जोड़े- घटाय
के जानकारी मिलथे।

20. रेसटीप



संगी जेला आजकल हमन लुका-छुपी
कईथन न ओईहा ,तईहा के रेसटीप आय ।
नान्हे संगी हो,ए खेल ल बहुत झन संगवारी
जुरमिल के खेलथे । एक झन संगी के दाम

रईथे , अऊ बांकी सब झन एती-ओती कौंटा
बिरकोनिया म लुकाय रथे । दाम देवईया ह
खोजत-खोजत आथे, अऊ जेन लईका ह
पहिली दिख जाथे ओला पहिली टीप, दूसरा
दिखथे तेला दूसराटीप, तीसरा ल तीसराटीप,
असने करत सब झन ल गिनत जाथे । ओई
बीच म अगर कोनो संगी पीछू से आके रेस
कईके छू देथे त फिर से ओकरेच दाम हो
जाथे । अऊ अगर कोई रेस नई करय त
पहिली टीप वाला संगी के दाम हो जाथे ।

21.रंग- बिरंगा



रंग बिरंगा के खेल म आठ दस कतको झन
लईका मन खेल सकत रईथे । एक लईका
के दाम रईथे, तेन लईका ह जोर से कईथे
– “रंग बिरंगा,

तब अऊ लईका मन कईथे – “कोन सा रंगा”

तब अपन पसंद के कोई भी रंग कईथे “नीला
रंग” त सब झन ल ओई रंग ल छूना रईथे, अऊ
जेन लईका ह रंग ल खोज के छूए नई सकय ।
ओकर दाम हो जाथे ।

22.घोर-घोर रानी



घोर – घोर रानी म, लईका मन एक दूसर के हाथ ल धरके गोल खड़े हो जाथे, एक झन सबले छोटे लईका ल बीच म खड़े कर देथे । सब झन गोल गोल गोल गाना गा गा के किंदरत जाथे-

“घोर- घोर रानी, अतका- अपना”
“घोर -घोर रानी, घुठूवा भर पानी ”
“घोर- घोर रानी ,माड़ी भर पानी”
“घोर- घोर रानी, कनिहा भर पानी “
“घोर- घोर रानी, कोहनी भर पानी “
“घोर- घोर रानी, छाती भर पानी”
“घोर- घोर रानी, घेंच भर पानी “

बीच म जे लईका ह संगे- संग
किंदरत रईथे, ओहा बाहर जाय के रस्ता
खोजत रथे । ए डहर ले जाहूँ, तारा कुची
लगाहूं । ऐ डहर ले जाहूँ, तारा कुची लगाहूं,
असने करके पारी के पारी सब बीच म आके
किंदरत जाथे ।

23. तोता उड़, मैना उड़



ए खेला ल लईका मन एक जगा बईठ के अराम
से खेलत रईथे, एती-ओती भागे दौड़े बर नई

लागय । एमा पांच-सात झन संगी हो जाथे अऊ,
अपन हाथ के एक – एक अंगठी ल भुईयां म
मढ़ाय रथें । एक संगी जेकर दाम रईथे तेन ह
कौवा उड़, मैना उड़, हाथी उड़ कहत रईथे ।
संगी मन उड़े वाला जीव के नाम लेथे त अपन
अंगठी ल उड़ाथे, अऊ नई उड़े सकय जेकर
नाम लेथे तो भुईयां से उंगली ल ऊपर नई करय
। अऊ जेन संगी ह उल्टा -पुल्टा करथे, ओकर
दाम हो जाथे ।

24.दस्सो- पिंजो



दस्सो- पिंजो के खेल म पांच झन खेलईया रईथे, सब संगवारी मन अपन- अपन नाम रखे रईथे | मैं दस्सा, मैं पंजा, ऐसे करके, दस्सा के एक उंगली, पिंजो के दो, काल के तीन,

कबूतर के चार, अऊ ढोल के पांच उंगली रईथे
। जेकर माथ रथे तेहा कहत जाथे_ दस्सा, पिंजो,
काल, कबूतर, ढोल । तब संगी मन अपन मर्जी
से कतको उंगली ल भुईयां म मढ़ाय रथे , दस्सा
,पिंजो, काल, कबूतर, ढोल कहत जाथे, अऊर
जेकर म जाके ढोल आथे तेला गदा गदऊल
मारथे, जभे ओहा हरदी गईठ कईथे तभे छोड़थे
। दूसर तरीका म आमने- सामने बईठ के चित्र
म बताय हवय तसना घलो मारथे ।

25. कुढ़ील

कुढ़ील खेल म दु ले चार संगी खेल सकथे, खेलत रथे तेन संगी मन अलग-अलग डहर म चल देथे । सब संगी चाक्, बत्ती या फेर कोयला धरे रथे, अऊ पथरा, खपरा, दीवार, भुईयां कोनो जगा, कई जगा मन म लुकाछिपा के छोटे-छोटे बहुत सारा लकीर खींचे रईथे ।

एक घंटा या आधा घंटा के समय रखे रईथे फेर सब कोई एक जगा कुढ़ील होंगे कईके जुर जाथे, अऊ अपन टईम पूरा होथे त सब कोई आथे । अऊ पारी के पारी ओकर पारे कुढ़ील ल खोजथे । खोजे ले पहिली बरा खाबे धन दूबी कईके सवाल पूंछथे जवाब में बरा कईथे त बारह जगा अऊ दूबी कही त दु जगा ल खोजना रईथे । संगी मन पात जाथे तेला काटते जाथे

|ओकर बाद कुढ़ील बाहच जाथे त जतका
बाहचे रईथे ओला गिनके, खोजने वाला मन ल
कुढ़ील वाला लईका ह मुटका मारथे | असने
पारी के पारी सब कोई के ल खोज- खोजके
गिनती करथे, अऊ मारत जाथे |

26. आम्बे-बाम्बे

आम्बे- बाम्बे खेला म दु झन से लेके दस, बारा
लईका मन खेल सकत रईथे । एक संगी के दाम
रथे, तेन ह दीवार कोती मुंह करके खड़े हो जाथे
अऊ बांकी संगी मन ओकर पीछू कोती । दाम
देवईया संगी ह, आम्बे- बाम्बे सिटी बाम्बे स्टाप
कथे त चलथें अऊ स्टाप कईथे त जसने रईथे
ओसने हालत म स्टाप (रुक)हो जाथे । अऊ नई
रूके रहय, अऊ दाम देवईया लईका ह ओला
हालत डोलत देख डारथे त ओकर दाम हो जाथे
।

27. चुरी जीत

चुरी जीत ल तीन चार झन लईका मन कांच
के रंगीन अऊ छोटे- छोटे चुरी मन ल बिन-
बिन के बहुत अकन सकेले रईथे । एक
जगह बईठ जाथें अऊ हथेली म धरके ऊपर
हथेरी म पलटथे , आने संगी मन कोई एक
चुरी ल छांटके गिरने नई देना ए कहथे, अऊ
नई गिरय त ओतका चुरी ल जीत जाथे
अगर गिर जाथे त ओतका ल हार जाथे।

28. चुरमुंदरी



चुरमुंदरी खेल म लईका मन अंगना, परछी , चौरा म गोल बनाके मड़िया के बईठ जाथे , अऊर अपन माड़ी म दूनो हाथ ल एक के ऊपर एक करके बईठ जाथे | एक संगी ह ओमन से दूर म पीछू करके खड़े

रईथे | एती एक झन ह अपन हाथ म गोंटी रखे रईथे
तेला सबो लईका मन के हाथ म रखे के नाटक
करथे, अऊ कोई भी एक लईका के हाथ म छोड़ देथे |
फिर बाहर खड़े संगी ल, आ जा कहके बुलाय
जाथे | ओहा अंताज के बताथे कि गोंटी ह काकर हाथ
म हवय | जान डारथे त जेकर म गोंटी रथे तेन ह बाहर
जाथे, अऊ ओकर जगह म ओहा बईठ जाथे |

29. चालगोटी (कसाड़ी)



चालगोटी खेले के लिए लकड़ी या फेर माटी के कसाड़ी बनाय रथे, जेमा दूनो तरफ छै- छै घर

यानेकी बारह घर अऊ दू ठन ढाबा बने रईथे। ओमा चाले बर तेंदूबीज नहितो चिचोला (अमली बीज) रखे रईथे। बारह बीज के एक पुक बनाय रथे। मतलब बारह पुक बीज के जरूरत रईथे। हर घर म बारह- बारह बीज भरके राखे रईथे। चाले के बेरा कोई भी एक घर के बीज मन ल धरके सब म एकक बीज डारत जाथे। एक घर के पहिली बीज ह सिरा जाथे तेहा आगे के घर के पुक ल जीत जाथे। अऊ अगर ढाबा के तीर म बीज सिरा जाथे त भटक जाथे, फेर आने संगी ह चालथे।

30. दही मही

दही मही लेला ओ, ए खेला म बहुत झन लईका मन गोला बनाके बईठे रथे, पीछे घुमके देखना नई रहय। एक लईका ,जेकर दाम रथे तेन ह एक ठन गमछा ल मुरकेट के धरे रईथे । अऊ सब बईठे रईथे तेमन के चारों मुड़ा म किंदर- किंदर के आवाज लगा लगाके दही मही बेंचें के नाटक करथे । “दही मही लेला ओ, का दही ओ “ भैंसी के दूध “ उत्तर म आने बच्चा मन बोलथे_ मईच ह खाहा, मईच ह पिहां ।

बच्चा के पीछू म रख देथे, एक बार घूमे के
बाद घलो नई देखे पाय रहय त ओ गमछा
ल उठा के ओई मेरा बईठे रथे तेला दौड़ा-
दौड़ा के मारथे ।

ए सब खेला मन के अलावा अऊ कई ठन खेला हावय जैसे- खिलामार, उड़ानबांटी, फोदा,
चोर-पुलिस, तीनखत्ती, डंडा-कुलकुल अऊ कतेक घलो होही।

संगी होवा, हमर छत्तीसगढ़ म अलग- अलग जिला म दस- बीस कोस के दूरिहा म भाखा
अऊ खेलकूद घलो म थोर- थोरकन के बदलाव आवत रईथे, तेकर कारन हो सकत हे। कई ठन
खेला के नाम अऊ नियम, तरीका ह कोनों- कोनों जगा म अलग घलो हो सकत हे।

आप मन के संगवारी

सुरेखा नवरत्न सहा. शिक्षक

कार्यस्थल - शा. प्रा. शाला – छिरा

विकास खंड- बिलाईगढ़

जिला- बलौदाबाजार (छ.ग.)

गृह जिला- जांजगीर- चांपा

मो.नं. 7611172332.

